

INUIT ATAQATIGIIT

Inatsisartuni



1. februar 2018

Inatsisartut Suleriaasianni § 37 imm. 1 naapertorlugu Naalakkersuisunut apeqquut imaattoq matumuuna saqqummiuppara.

Naalakkersuisunut apeqquut:

- 1. Eqqumiitsuliornermut ilinniarfiup Nuummiittup Aasiannut nuunneqarnissaata pilersaarusiorneqarnera sumut killippa? Qaqugu Aasiannut nuunneqarnissaa naatsersuutigineqarpa?**
- 2. Ilinniartut amerlanerusut tiguneqartalernissaat pilersaarutigineqarpa?**
- 3. Eqqumiitsuliornermut ilinniarfiup Aasiannut nuunneqarnissaa ilutigalugu nipilersornermik ilinniarfittalerlugu sananeqassagaluaruni tamanna nunatta karsianut qanoq naleqassagaluarpa? Uani eqqarsaatigaara eqqumiitsuliornermik ilinniarfiup ilinniartorisartagaata amerlaqataatut amerlatigisunik ilinniartoqarsinnaasumik inuusuttunut, inersimasunullu musikhøjskolut ittumik ilaneqassagaluaruni.**

(Inatsisartuni ilaasortaq Peter Olsen, Inuit Ataqatigiit)

Tunggavilersuut:

Naluneqanngitsutut piffissami kingullermi Naalakkersuisut aaliangersimaqqammerput eqqumiitsuliornermut ilinniarfiup Nuummiittup Aasiannut nuunneqarnissaa.

Isumaq siunertarineqartorlu kusanaraluassusia; Nuummut eqiterivallaarani Nuup avataanut ilinniartoqarfinnik suliffeqarfinnullu siammarteriniarneq.

Taamaattoq aamma nalunngilarput eqqumiitsuliornermut ilinniarfik Nuummiittoq ukiorpassuarini Naalakkersuinikkut sumiginnagaasimaqisoq, ukiorpassuarni ineriartortinneqarsimangilaq.

Nuummi ilinniartoqarfinnut allanut naleqqiullugu mikingaarami ulluinnarniluunniit iluamik Nuummiinnersoq malugineqarsinnaaneq ajortoq. Sulisoq ataasinnaavoq, saniatigut pulaarlutik ilinniartitsisuusartut eqqarsaatigissanngikkaanni. Agguaqatigiisillugu ilinniartut ukiumut taamaallaat tallimat missaaniiginnartarput.

Suliffeqarfittut ilinniartoqarfittullu mikisuarannguuvooq allanut naleqqiullugu.

Taamaattumik paaserusukkiga Aasiannut nuunneqarneratigut ilinniartunik amerlanerusumik tigusisoqartalernissaa pilersaarutigineqarnersoq, minnerunngitsumillu nipilersornermik ilinniarfittalerlugu sananeqassagaluaruni nunatta karsianut tamanna qanoq naleqarumaarner-soq.

Nunarput minnerunngitsumillu Asiaat nipilersortartoqarfissuupput, soorluuna pissusissamisuginnassagaluartoq Aasianni eqqumiitsuliornermut nipilersornermullu ilinniarfimmik pilersitsivigineqarsinnaasuugaluaruni.

Kissatigaaralu apequtima ullut qulit iluanni akineqassasoq.